

## Tutu ñanoó ña t̄i'ví taPablo kua'an ña nda'a nañoo Tesalónica

*Xí'in to'on yó'o taPablo, taSilvano xí'in taTimoteo chíndeé  
ra  
n̄ivi na kándixa Jesucristo na táku ñoo Tesalónica*

<sup>1</sup> Xí'in to'on yó'o yí'i, taPablo, xí'in taSilvano,\* ta xí'in taTimoteo, chíndeé nd̄i ndó'ó na táku ñoo Tesalónica, ndó'ó na nákutá'an xa'a ña kisa ká'no ndó Yivá yó Ndios xí'in Jesucristo, Ta taKá'no noo yó. ¡Ná ke'é Ndios Yivá yó xí'in Jesucristo taKá'no noo yó ñava'a xí'in ndó, ta ná taxi ra koo ñava'a ini ndó!

*N̄ivi na kándixa Jesucristo na táku ñoo Tesalónica  
va'a ní kua'an na yich̄i Ndios*

<sup>2</sup> Ndi'i saá k̄iv̄i ká'an nd̄i táxi nd̄i ña táxa'vi ña'á Ndios xa'a ndi'i ndó'ó. Ndi'i saá yich̄i ká'an nd̄i xí'in Ndios, ta náká'an nd̄i xa'a ndó, ta ndúkú nd̄i noo ra ñava'a xa'a ndó'ó. <sup>3</sup> On vasa sándakoo nd̄i táxi nd̄i ña táxa'vi ña'á Yivá yó Ndios xa'a ña kua'a ní chiño va'a kisa ndivi ndó. Saá ké'é ndó chi kándixa ndó Jesucristo, ta kí'vi ní ini ndó xíni ndó ra. Ta táxi nd̄i ña táxa'vi ña'á Ndios chi ndixa ñii ñii k̄iv̄i va'a ndík̄on ndó yich̄i ra, saá chi ndáa ini ndó ta ndáti ndó ndixa Jesucristo kasa ndivi ra ndi'i to'on ña n̄ika'an ra. <sup>4</sup> Nañani yó xí'in náki'va yó, n̄ivi na kí'vi ní ini Ndios xíni ra kúu ndó'ó, ta xíni nd̄i Ndios n̄ikaxin ra ndó'ó ña kuu ndó n̄ivi na kundik̄on ña'á. <sup>5</sup> Chi k̄iv̄i nd̄ato'on nd̄i xí'in ndó to'on ñava'a xa'a Jesucristo, ta on s̄iv̄i ndasaá kuiti to'on m̄i nd̄i x̄ikuu ña, ta xí'in ndee Níma Ndios n̄ika'an

\* 1:1 Inka k̄iv̄i taSilvano kúu Silas.

ndi xí'in ndó ta xí'in ndee Níma Ndios ke'é ndi kua'a ní ñava'a xa'a ndó. Ta ndino'o ini ndi kándixa ndi ñandaa kúu to'on nika'an ndi xí'in ndó. Xa kúndaa ini ndó ndasaá va'a xitaku ndi xí'in ndó, ta chikaa ndi ndee ña chindeé ndi ndó'ó, chi kí'vi ní ini ndi xíni ndi ndó'ó.

<sup>6</sup> Ta saá ndó'ó kixá'á ndó kutaku ndó ñii kí'va saá ndatán táku ndi'i, ta ndatán xitaku Jesucristo kivi ñixiyo ra ñoyívi yó'o. Vará xó'vi ní ndó xa'a ña ndíkõn ndó yichi Jesucristo, ta Níma Ndios sákusij ña ini ndó'ó, ta xí'in ñasij ini ndó ñaki'in va'a ndó to'on Ndios ña nika'an ndi xí'in ndó. <sup>7</sup> Ta xa'a ña va'a táku ndó, sáná'a ndó ñoo inkã ñivi na kándixa Jesucristo na táku ñoo estado Macedonia xí'in inkã kua'a ñoo estado Acaya ña ndasaá kuchiño va'a kundikõn nayó'o yichi Jesucristo. <sup>8</sup> Ta ndó'ó xa ndato'on ndó to'on Ndios xí'in inkã ñivi, ta sakuíta ní'no kã ndó to'on yó'o ndi'i saá xiiña estado Macedonia xí'in ndi'i saá xiiña estado Acaya. Ta saá ñivi na táku ndi'i saá xiiña xini so'o na xa'a ña va'a kándixa ndó Ndios, ñakán õn vása xíni ñó'ó ka'an kã ndi xa'a ñava'a ké'é ndó. <sup>9</sup> Nda víka, ñivi na xíni ndasaá táku ndó, ndákuijn na xa'a ndó'ó, ká'an na ndasaá va'a ñaki'in ndó ndi'i. Ta ndato'on na xí'in tá'an na ndasaá ndixa ñasama ini ndó, ta sandakoo ndó ña kisa ká'no ndó ñaidolo xí'in inkã ña'a ña xani sijní ndó xikuu ndios mij ndó xina'á, ta vitin kixá'á kisa ká'no ndó Ndios ndixa ndino'o, tatáku, ta ndíkõn ndó yichi ra. <sup>10</sup> Ta ká'an na ndi vitin ndáti ndó Jesucristo, ta kúu Sa'ya Ndios, ña kee tuku ra ñoyívi ñino, ta kixaa ra ñoyívi yó'o, saá chi Ndios sanatakũ ra Jesucristo ña sakaku ra mij yó, koto xo'vi ní yó kivi Ndios kasa nani ra xa'a kuachi ñivi.

## 2

*TaPablo ndáto'on ra xí'in na kándixa Jesucristo  
xa'a chiño ke'é ra xí'in na*

<sup>1</sup> Nañani yó xí'in náki'va yó, xíní ndó ndí on sivi ña mañi xikuu ña nixaa ndi noo ndó ta nika'an ndoso ndi to'on xa'a Jesucristo xí'in ndó, chi ndó'ó chikaa so'o ndó to'on yó'o ta kisa ndivi ndó ña. <sup>2</sup> Xíní ndó ndí kivi ta'an ka xaa ndi ñoo noo táku ndó, nixoví ní ndi ñoo Filipos, chi ke'é na xí'in ndi ña on vá'a ña sakuka'an na noo ndi. Ta saá ni, Ndios chindeé ra ndi'i ña ni-taxi ra kuyi'ví ní ndi kivi nixita ndi noo ndó'ó, ta nika'an ndoso ndi to'on Ndios ña ká'an xa'a Jesucristo, vará kua'a ní nivi ndukú na ndasaá kasi na noo ndi ña on ndato'on ka ndi to'on yó'o. <sup>3</sup> Ta to'on Ndios ña nika'an ndoso ndi xí'in ndino'o níma ndi, ñandaa kúu to'on yó'o, on koó to'on vatá ñó'o xí'in ña, ni on vása ní-ka'an ndi to'on livi ña sandá'ví ndi nivi. <sup>4</sup> Ta mii Ndios nika'an ra ndí va'a niya'a ndi noo ñayo'vi ña xito ndoso ndi'i, ta xa'a ñayó'o Ndios sanakuiso chiño ra ndi'i ña ká'an ndoso ndi to'on va'a xa'a Jesucristo noo nivi. Xí'in to'on ña ká'an ndi on vása ndukú ndi ndasaá kuiti sakusii ndi ini nivi, ndatán kóni mii na, ta nda víka ndukú ndi ndasaá sakusii ndi ini Ndios. Chi Ndios kúu ta ta xito ndoso níma yó ndasaá yóo ña. <sup>5</sup> Xíní mii ndó nda ñii kivi on vása ní-ka'an ndi to'on livi án to'on vatá xa'a ña sanoo ndi ini ndó, ni on vása ní-sandá'ví ndi ndó'ó xa'a ña taxi ndó si'ún nda'a ndi. Mii Ndios ndakuiin ra xa'a to'on yó'o ndí ñandaa kúu ña. <sup>6</sup> Ni noo ndó'ó, ni noo nda ñii inká nivi, on vása ní-ndukú ndi ña kasa ká'no na ndi'i. Vará kómí ndi ndayí ña kasa to'ó ndó ndi'i, ta chindeé ndó ndi'i xí'in ña xíní ñó'ó ndi, chi naapóstol\* na kómí ndayí Jesucristo kúu ndi'i, ta on vása ní-ke'é ndi saá. <sup>7</sup> Ta livi ní vivii ke'é ndi xí'in ndó, ndatán ke'é ñii ña'a xí'in sa'ya yúta ña, saá nixiyo ndi xí'in ndó. <sup>8</sup> Ndixa ndeé ní kí'vi ini ndi xíini ndi ndó'ó. Ta xí'in ndino'o níma ndi ndato'on ndi to'on Ndios xí'in ndó. Tānda nixiyo ti'va ndi taxi xí'in mii

\* 2:6 To'on "apóstol" kóni kachí ña: Nivi na tí'ví taká'no kasa ndivi na chiño ra.

ndi ña kivi ndi xa'a ndó, saá chi ndó'ó nduu ndó nivi na kí'vi ní ini ndi xíni ndi.

<sup>9</sup> Nañani yó xí'in náki'va yó, ndixa náka'an ndó ndasaá xitaku ndi kivi xindoo ndi xí'in ndó, chi ndiví ñoo ndeé ní kisa chiño ndi xa'a ña kukomí ndi si'ún ña sata ndi ndi'i ña xíni ñó'ó mji ndi. Saá chi ni-xiin ndi sandi'i ndi ini ndó ña cha'vi ndó ña xíni ñó'ó ndi kivi nika'an ndoso ndi to'on Ndios noo ndó. <sup>10</sup> Ndó'ó xí'in Ndios kúu na ndákuiin xa'a ndi, ndasaá xitaku ndi noo ndó'ó, nivi na kándixa Jesucristo, chi xí'in ñayii, ta xí'in ñandakú xitaku ndi xí'in ndó, ta on koó nivi kuchiño taxi kuachi xa'a ndi. <sup>11</sup> Tá yóo ñii taa ta kúu yivá va'a xí'in sa'ya ra, saá nixiyo ndi xí'in ndó, chi ndato'on ndi xí'in ndó ña chikaá ndi ndee ini ndó ta saná'a ndi ndó'ó ko'on ndó yichi ña ndaa. <sup>12</sup> Ta sakuiso ndi ndó'ó ña vivii kutaku ndó ndatán táku nivi na ndikon Ndios, chi Ndios kúu taa ta nakana ndó'ó ña kí'vi ndó yichi noo xá'nda chiño ra, chi kóni ra ña kutaku ndó xí'in ra noo yóo ndi'i ñava'a ña livi ña yé'e.

<sup>13</sup> Ndi'i saá kivi táxi ndi ña táxa'vi nda'a Ndios, chi kivi xini so'lo ndó to'on ña nika'an ndi xí'in ndó, ta va'a naki'in ndó ña. Ta on vása ní-xani sini ndó ndí ndasaá kuiti to'on nivi kúu ña, ta chikaá so'lo ndó ña ka'an to'on yó'o, chi kúndaá ini ndó ndixa to'on Ndios kúu ña nika'an ndi xí'in ndó, ta mji to'on yó'o kisa chiño ña ini ndó'ó, nivi na kándixa ña'á. <sup>14</sup> Nañani yó xí'in náki'va yó, ñii kí'va ndatán nixo'vi inká nivi na ndóo ñoo estado Judea, na kúu na nákutá'an xa'a ña kisa ká'no na Jesucristo, saá nixo'vi ndó'ó. Chi najudío natá'an mji na kúu na saxo'vi ña'á. Ta saá ndó'ó, natá'an mji ndó kúu na saxo'vi ndó'ó xa'a ña kándixa ndó Jesucristo. <sup>15</sup> Ta nivi na xa'ni Jesucristo, najudío natá'an mji ra xikuu na, ta naxii síkuá nayó'o xikuu na xa'ni naprofeta na nika'an ndoso to'on Ndios kuyá xina'á. Ta saá tuku najudío natá'an i kúu na ke'é kuachi xí'in ndi, ta taxin na ndi'i ña tava na ndi'i ku'a ní

ñoo. Nayó'o ké'é na ña on vá'a ña on vása kúsii ini Ndios xíni ra, ta on xiin na taxi na ña naki'in inka nivi to'on ñava'a xa'a Jesucristo. <sup>16</sup> Ta saá najudío yó'o sási na noo ndi kivi ndátó'on ndi to'on va'a xa'a Jesucristo xí'in inka nivi na on vása kúu najudío, saá chi on xiin na ña sakaku Ndios nayó'o. Ta xa'a ña ké'é na ña on vá'a yó'o, sákuiso ka na kuachi satá mii na, vará xa yóo ku'a ní kuachi ndiso na. Ta saá ñii kivi ña vaxi, Ndios saxo'vi ní ra nayó'o xa'a ndi'i ña on vá'a ke'é na.

*TaPablo kóni tuku ra koni ra nivi na kándixa Jesucristo na táku ñoo Tesalónica*

<sup>17</sup> Nañani yó xí'in náki'va yó, vará xíni ñó'ó kuxiká ndi noo ndó ñii káni lo'o, ta on vása sándakoo ndi ña xáni siní ndi xa'a ndó'ó. Ta ndeé ní kóni ndi nakutá'an tuku ndi xí'in ndó ña kundaa ini ndi ndasaá yóo ndó. <sup>18</sup> Ta yi'i taPablo, ku'a ní yichi ndukú i xaa i tuku koto i ndó'ó, ta ni-kuchiño xaa i chi ñanímá ndiva'a ká'no Satanás on vása ní-taxi ña xaa i, chi taxi ña ku'a ní ña on vá'a sasi yichi i. <sup>19</sup> Kóni ní ndi koto ndi ndó'ó, chi ndó'ó kúu na sákusii ini ndi xa'a ña va'a ní ndíkõn ndó yichi Jesucristo. Ta kivi ndikó ra ñoyívi yó'o, ndáti ndi ña on kuka'an noo ndi xa'a ndó'ó, ta kusii ka ini ndi xa'a ndó'ó. Ndatán yóo ñava'a ña náki'in nivi xa'a ña va'a kisa ndivi na chiño, saá koo ndó'ó xí'in ndi kivi kuita yó noo Jesucristo. <sup>20</sup> Ta xa'a ña va'a kándixa ndó Ndios, kánóo síkón ñato'ó ndi noo nivi, ta Ndios kasa ká'no ra ndi'i xa'a ndó'ó. Ndixa kúsii ní ini ndi xíni ndi ndó'ó.

### 3

<sup>1</sup> Ta ñii kivi ña on vása ní-kundeé ka ini ndi kundati ndi, chi kóni ní ndi koni so'o ndi án yóo va'a ndó, ta saá xani siní ndi va'a ná kindoo ka ndi ñoo Atenas, <sup>2</sup> ta ti'ví ndi ñani yó taTimoteo xaa ra noo ndó. Ta taTimoteo yó'o kúu ta ta kisa chiño noo Ndios, ta ñii káchí xíka ra xí'in ndi

ká'an ndoso ndi to'on ñava'a xa'a Jesucristo. Ta ti'ví ndi taTimoteo ña xaá ra ñoo ndó ta chindeé ra ndó'ó ña va'a kua'no ka ndó yichi Jesucristo, ta ka'an ra to'on va'a xí'in ndó xa'a ña chikaá ra ndee ini ndó ña va'a ka kundikon ndó yichi Jesucristo. <sup>3</sup> Ta saá on ndí'i ní ini ndó xa'a ñayo'vi xó'vi ndó vitin. Chi ndó'ó xíni va'a ndó ndí ndi'i mii yó na kúu ñivi na kándixa Jesucristo xíni ñó'ó xo'vi yó ñayo'vi. <sup>4</sup> Saá chi kivi xindoo ndi xí'in ndó, ta ndato'on ndi xí'in ndó ndí vaxi kivi ña xo'vi yó xa'a ña kándixa yó Jesucristo. Ta vitin xíni ndó ndí ndixa kixá'á xo'vi yó ndatán yóo ña nika'an ndi xí'in ndó. <sup>5</sup> Ta saá kixaa kivi ña on vása ní-kuchiño kundati ka i, chi ndeé ní kóni i koni so'o i án va'a ndikon ka ndó yichi Jesucristo, vará xó'vi ní ndó. Ñakán ti'ví i taTimoteo xaá ra koto ra ndó'ó, saá chi ndí'i ní ini i xa'a ndó, koto ñaníma ndiva'a ká'no chu'u ña ndó'ó, ta nakava ndó ke'é ndó ña on vá'a. Ta saá nda maní kuu chiño ña kisa ndivi ndi xí'in ndó, níkúu.

<sup>6</sup> Ta taTimoteo nixaa ra ñoo táku ndó, ta vitin ndikó ra kixaa ra yó'o, ta ndato'on ra xí'in ndi to'on va'a xa'a ndó. Ndato'on ra ndí ndixa kándixa va'a ndó Jesucristo, ta kí'vi ní ini ndó xíni tá'an ndó, ta ndi'i saá kivi náká'án ndó xa'a ndi'i, ta kóni ndó koto ndó ndi'i ñii ki'va ndatán kóni ndi koto ndi ndó'ó. <sup>7</sup> Ñakán kía, nañani yó xí'in náki'va yó, vará xó'vi ní ndi ta ná'no ní tondíni kómí ndi, ta vitin nduva'a ini ndi ta kúsii ní ini ndi, chi xini so'o ndi ña ndixa ndó'ó kándixa ndino'o ini ndó Jesucristo, ta viví ndikon ndó yichi ra. <sup>8</sup> Ndatán yóo ña taxi ndee ña kutaku ka ndi, saá yóo ña kúndaá ini ndi ndí ndixa va'a ní ndikon ndó yichi Jesucristo. <sup>9</sup> Ta on vása ní'i ka ndi to'on ña kuchiño taxi ndi ña táxa'vi ña'á nda'a Ndios xa'a ndó'ó, chi niya'a ní ká'no ña kúsii ní ini ndi xa'a ña va'a táku ndó. <sup>10</sup> Ndivi ñoo ndino'o ní ini ndi xáku ndá'ví ndi ñoo Ndios, ká'an ndi xí'in ra ña taxi ra kee ndi ko'on ndi koto ndi ndó'ó. Chi kóni ndi chindeé ndi ndó'ó ña kandixa ndino'o ka ndó

ta kua'no ka ndó yichi Jesucristo.

*TaPablo xí'in natá'an ra ká'an na xí'in Ndios xa'a nivi na kándixa Jesucristo*

<sup>11</sup> Ndúkú ndi noo Yivá yó Ndios xí'in Jesucristo, Taa taKá'no noo yó, ña taxi ra ña kuchiño ko'on ndi koto ndi ndó'ó. <sup>12</sup> Ta Jesucristo ná chindeé ra ndó'ó ña ñii ñii kivi kuki'vi ka ini ndó koni tá'an xí'in mji ndó, ta ñii saá kuki'vi ini ndó koni ndó ndi'i inka nivi. Ñii ki'va ndatán yóo ña kí'vi ní ini ndi xíini ndi ndó'ó saá kóni ndi ña kuki'vi ini ndó koni ndó inka nivi. <sup>13</sup> Ta saá Jesucristo ná chikaa ra ndee ini ndó'ó ña va'a ní ka ko'on ndó yichi Ndios, ta xí'in ña ndino'o ní ini ndó nduu ndó nivi na va'a, na ndii noo Ndios. Ñakán on koo kuachi kuiso ndó noo Ndios, kivi ndikó Jesucristo ñoyívi yó'o, xí'in ndi'i nayii na táku xí'in ra.

## 4

*Ndasaá xíni ñó'ó kutaku yó ña sakusii yó ini Ndios*

<sup>1</sup> Nañani yó xí'in náki'va yó, xí'in ndayí Jesucristo, Taa taKá'no noo yó, ndát'o'on ndi xí'in ndó ta xáku ndá'ví ndi noo ndó ña ñii káchí ndatán yóo ña xa saná'a ndi ndó'ó, saá xíni ñó'ó kutaku ndó, ta va'a sakusii ndó ini Ndios. Xa va'a ní ndik'on ndó yichi ra vitin, ta ndúkú ndi noo ndó ña va'a ka kundik'on ndó yichi ra ñii ñii kivi vaxi.

<sup>2</sup> Xa xíni va'a ndó xa'a ña saná'a ndi ndó'ó xí'in ndayí Jesucristo. <sup>3</sup> Ña kóni Ndios kúu ña nduu ndó nivi na va'a, na ndii noo ra. Ñakán Ndios on xijn ra ña nda ñii ndó'ó ki'vi ndó kuachi ñoyívi xí'in inka ña'a án inka taa. <sup>4</sup> Ta Ndios kóni ra ñayó'o: Ñii ñii taa xíni ñó'ó kundaa ini ra ndasaá to'ó ní ta vivii kutaku ra xí'in ñásí'í ra. <sup>5</sup> Ta nda lo'o on vá'a ña kutoo ní ndó koni ndó inka ña'a án inka taa, ta xíni ñó'ó nasita xí'in mji ndó ña on ke'é ndó ña on vá'a ña kútoo ní yiki koñu mji ndó, ndatán ké'é nivi na on

vása ndíkɔn yichì Ndios. <sup>6</sup> Ta ɔn taxi xí'in miji ndó ke'é ndó ña ɔn vá'a saá xí'in nañani yó án náki'va yó na kándixa Jesucristo. Tá ki'vi ndó kuachi xí'in ñási'í ñani ndó án xí'in yii ki'vi ndó, ta ñayó'o kúu kuachi ña sándá'ví ndó ñivi na ndíkɔn Jesucristo xí'in yó, ta Ndios saxo'vi ra ndó'ó xa'a ña ɔn vá'a yó'o, ndatán yóo ña ñika'an ndi xí'in ndó. <sup>7</sup> Chi ɔn sivi xa'a ña kutaku kini yó kúu ña kana Ndios miji yó, ta kana ra miji yó ña kutaku yii yó noo ra. <sup>8</sup> Ta ñivi na ɔn xiin kandixa to'on yó'o, ta nayó'o xáa noo na ndi'i, ta ñii ki'va saá xáa noo na miji Ndios, taa ta taxi Níma miji ra kutaku ña ini ñii ñii yó.

<sup>9</sup> Ta ɔn vása xini ñó'ó ka ka'an ndi xí'in ndó xa'a ña kuki'vi ini ndó koni tá'an ndó, chi xa sakuá'á ndó noo miji Ndios ndasaá ndixa kuki'vi ini ndó koni tá'an ndó. <sup>10</sup> Ñandixa kúu ña kí'vi ini ndó xini ndó ndi'i nañani yó xí'in náki'va yó na táku ndi'i ñoo estado Macedonia. Ta saá ni, xáku ndá'ví ndi noo ndó'ó ña kuki'vi ka ini ndó koni tá'an ndó, <sup>11</sup> ta chikaá ndó ndee ña vivii kutaku ndó xí'in inká ñivi, ta ndasaá kuiti xa'a chiño miji ndó kundi'i ini ndó. Kasa chiño ndó xa'a ña xini ñó'ó ndó, ndatán yóo ña xa'nda chiño ndi noo ndó. <sup>12</sup> Tá kisa ndivi ndó ñayó'o, ta va'a kanóo to'on xa'a ndó noo inká ñivi, ta ɔn kumani ka nda ñii ña xini ñó'ó ndó nda'a ndó.

*To'on yó'o ká'an xa'a kivi ña ndikó Jesucristo ñoyivi yó'o*

<sup>13</sup> Nañani yó xí'in náki'va yó, kóni ndi ña kundaá va'a ini ndó ndí ñivi na kándixa Jesucristo ta ñixi'i na, nayó'o ndixa natakú na kivi vaxi. Ta xa'a ña kundaá ini ndó ñayó'o, ta ɔn kuchuchú ní ini ndó, ndatán kúchuchú ní ini ñivi na ɔn vása ndáa ini ndí kivi vaxi ndixa natakú na ta kutaku na xí'in Ndios ndi'i saá kivi. <sup>14</sup> Ta miji yó, kándixa yó ndí Jesucristo ñixi'i ra ta natakú ra, ta ñii káchí saá Ndios sanatakú ra ndi'i ñivi na ñixi'i, na kúu na kándixa Jesucristo.



<sup>15</sup> To'on ña ká'an ndi xí'in ndó vitin ñii kúu ña xí'in to'on ña xa saná'a Jesucristo, Taa taKá'no noo yó. To'on yó'o káchí ña ndí kivi ndikó Jesucristo ñoyívi yó'o, ta nivi na kándixa ña'á, na kúu na táku kivi ndikó ra, on ndaa si'na nayó'o noo nivi na xa nixi'i, ta ndi'i nivi na kándixa Jesucristo, án na táku kuu na, án na xa nixi'i kuu na, ta xí'in ndee Ndios ndi'i nayó'o ndaa na ta nakutá'an na xí'in ra. <sup>16</sup> Saá chi xí'in to'on ña ka'nda chiño ra, ta xí'in to'on ña ka'an ñaáangel ká'no, ta xí'in ndusu ña nda'yi tón trompeta Ndios, Jesucristo ndikó ra ñoyívi yó'o. Ta nivi na kándixa ña'á, na kúu na xa nixi'i, Ndios si'na sanatakú ra nayó'o ta ndani'i ra na. <sup>17</sup> Ta saá, nivi na táku, na kúu na kándixa ña'á, Ndios ndani'i ra nayó'o, ta saá nakutá'an ndi'i yó xí'in Jesucristo tixin viko ña kánóo nino. Ta saá kutakú yó xí'in Jesucristo ndi'i saá kivi ña vaxi. <sup>18</sup> Va'a xí'in to'on yó'o chikaa ndó ndee ini tá'an ndó.

## 5

<sup>1</sup> Nañani yó xí'in náki'va yó, on vása xíni ñó'ó ka'an ndi xí'in ndó ndá kivi, án ndá yoo ndikó Jesucristo ñoyívi yó'o, <sup>2</sup> chi xa xíni va'a ndó ndí ndikó ra ñii kivi ña on vása ndáti nivi, chi ndatán yóo ña kixaa ñii takuí'ná ñoo, saá koo kivi ndikó Jesucristo ñoyívi yó'o. <sup>3</sup> Kivi ña ká'an nivi na on vása kándixa Jesucristo, káchí na saá xí'in tá'an na: “Va'a ní táku yó vitin, ta on koó ka ña ndi'i ini yó xa'a”, káchí na, ta saá ñii kama kixaa ña xo'vi ndi'i nivi yó'o ta ndi'i xa'a na. Ndatán ndó'o ñii ña'a kivi kóni kaku sa'ya ñá, ta xandikon ñii kama kixá'a ña kí'vi ní tixin ñá, saá kundo'o nivi kivi ndikó Jesucristo ñoyívi yó'o, chi xandikon kixá'a xo'vi na, ta on kuchiño ka naní'i na ndasaá kaku na noo ña kundivi kivi saá. <sup>4</sup> Ta ndó'ó, nañani yó xí'in náki'va yó, on sivi nivi na xíka yichí noo naa kúu ndó. Ñakán kía, kivi ndikó Jesucristo ñoyívi yó'o, on naka'nda ini ndó ndatán náka'nda ini nivi kivi kixaa takuí'ná ki'vi ra ve'e

na. <sup>5</sup> Ndó'ó xí'in ndi'i na ndíkon yichi Jesucristo, táku yó yichi noo yóo ño'o yé'e; on vása ndíkon yó yichi noo naa ní, noo yóo kua'a ní noo ña on vá'a. <sup>6</sup> Ta saá on vá'a kutaku yó ndatán táku nivi na on vása yóo ti'va naki'in Jesucristo kivi ndikó ra. Nda víka xini ñó'ó kutaku yó ndatán táku nivi na ndóo ndító, ta kasa kuenda xí'in mji yó ña vivii kutaku yó. <sup>7</sup> Ta nivi na ndíkon yichi noo naa ní, ké'é na ndatán ké'é nivi ñoó naa ní. Saá chi nayó'o kisin na, ta xí'i ní na, ta nivi na ndáñó'ó ini kúu na. <sup>8</sup> Ta mji yó, on vása táku yó saá, chi xika yó yichi yé'e, ta ñakán xini ñó'ó vivii kundito yó, ta xini ñó'ó kandixa yó Jesucristo, ta kuki'vi ini yó koni tá'an yó. Ta xini ñó'ó ndixa kundaa ini yó ta kundati yó ndí Jesucristo kasa ndivi ra to'on ra ña sakaku ra mji yó. Ta ña ndíkon yó yichi yé'e saá, ñayó'o kúu ña ndaa mji yó koto ke'é yó ña on vá'a. Chi xini yó ndí ñii ñii tãropa ndixin ra xí'in kaa ña ndaa mji ra; yóo kaa ña ndási kándiká ra, ta yóo kaa ña kánóo sini ra. Ta ndatán yóo kaa yó'o ña ndaa ñii ñii tãropa ña on satakué'e na ra, saá yóo ña vivii táku yó yichi yé'e, chi saá ndaa yó xí'in mji yó ta sási ña mji yó koto ke'é yó ña on vá'a. <sup>9</sup> Ndios kóni ra ña kutaku yó saá, chi on sivi xa'a ña saxo'vi ra mji yó kúu ña ñikaxin ra yó. Ta Ndios ñikaxin ra mji yó xa'a ña sakaku ra yó kúu ña. Ta xa'a ña kisa ndivi Jesucristo, Taa tãKá'no noo yó, Ndios kúchiño sakaku ra mji yó. <sup>10</sup> Jesucristo ñixi'i ra xa'a kuachi yó. Ta saá ndi'i mji yó, nivi na kándixa ña'á, ndixa kutaku yó xí'in ra ndi'i saá kivi ña vaxi. Ta saá tá táku ka yó kivi ndikó Jesucristo, án xa ñixi'i yó, ta ndixa kutaku yó xí'in ra ndi'i saá kivi ña vaxi. <sup>11</sup> Ta vitin sakusii ka ndó ini tá'an ndó xí'in to'on yó'o, ta chindeé tá'an ndó ña va'a ka kundikon ndó yichi Jesucristo. Ñii káchí ndatán yóo ña chindeé tá'an ndó vitin, ñii ki'va saá chindeé tá'an ka ndó kivi vaxi.

*TaPablo ndátò'on ra xí'in ñivi na kándixa Jesucristo ndasaá va'a xínì ñó'ó kutaku na*

<sup>12</sup> Nañani yó xí'in náki'va yó, xáku ndá'ví ndi ñoo ndó ña kasa to'ó ndó ñivi na sakuiso chiño Jesucristo. Saá chi nayó'o kisa chiño na xí'in ndó, ndátò'on na xí'in ndó, ta chindeé na ndó'ó ko'on ndó yichi Jesucristo. <sup>13</sup> Kasa to'ó ndó ñivi yó'o ta kuki'vi ini ndó koni ndó na xa'a chiño ña ké'é na xí'in ndó. Ta saá xínì ñó'ó vivii kutaku ndó xí'in tá'an ndó.

<sup>14</sup> Ta tuku xáku ndá'ví ndi ñoo ndó, ña ka'an ndó xí'in nañani yó ta xí'in náki'va yó, na on xiin kasa chiño. Ka'an ndó xí'in na ndí xínì ñó'ó kasa chiño na. Ta ka'an ndó chikaa ndó ndee ini nañani yó xí'in náki'va yó na kúu na kúchuchú ini chi xáni sijnì na ña on kündeé ka na kundikon na yichi Ndios. Ta saá tuku chindeé ndó nañani yó xí'in náki'va yó na lo'o ní kündeé ñoo ña on vá'a. Ta xí'in ña ká'no ini ndó kutaku ndó xí'in ndi'i ñivi yó'o.

<sup>15</sup> Tá yóo ñivi na ké'é ña on vá'a xí'in ndó, ta on cha'vi ndó nayó'o xí'in inka ña on vá'a. Ta ndi'i saá kivi ndukú ndó ke'é ndó ñava'a xí'in natá'an ndó ta xí'in ndi'i inka ñivi.

<sup>16</sup> Ta xínì ñó'ó kusij ní ini ndó ndi'i saá kivi. <sup>17</sup> Ta nda lo'o on sandakoo ndó ká'an ndó xí'in Ndios ndi'i saá kivi. <sup>18</sup> Tá on vása va'a táku ndó, án va'a ní táku ndó, ta saá ni, xínì ñó'ó taxi ndó ña táxa'vi ña'á nda'a Ndios. Saá chi ñayó'o kúu ña kóni Ndios ke'é ndi'i ñivi na kándixa Jesucristo.

<sup>19</sup> On kasi ndó ñoo Níma Ndios, ta va'a taxi ndó ná kasa chiño Níma Ndios ini mji ndó. <sup>20</sup> Ta on vá'a xaa noo ndó to'on ña ká'an Níma Ndios saná'a ña ndó'ó. <sup>21</sup> Ta xínì ñó'ó koto ndoso ndó to'on ña ká'an ñivi sáná'a na, tá káchí na ndí to'on sáná'a na kúu ña taxi Níma Ndios nda'a na. Ta saá naki'in kuiti ndó to'on va'a, ta on chikaa so'o ndó ña on vá'a. <sup>22</sup> Chi xínì ñó'ó kuxíká ndó ñoo ndi'i ñoo ña on vá'a.

<sup>23</sup> Ta vitin ndúkú ndi noo Ndios, taa tá táxi ña koo ñava'a ini yó, ña chindeé ra ndó'ó ta nduu ndó nivi na va'a na ndii noo ra. Ná kundaa va'a Ndios ñii ní ñii ñii ndó xa'a ña va'a ndii koo níma ndó xí'in ini ndó ta xí'in yíkí koñu ndó. Ta saá on kóo ka kuachi kuiso ndó kivi Jesucristo, Taa táKá'no noo yó, ndikó ra ñoyívi yó'o. <sup>24</sup> Ndios kúu taa tá kana ndó'ó kundikon ndó yichi ra, ta ndixa tanda va'a kúu ra, ñakán Ndios kasa ndivi ra to'on nika'an ra ña nduu ndó nivi na ndii noo ra.

*TaPablo ndúkú ra ñava'a xa'a nivi na kándixa Jesucristo ñoo Tesalónica*

<sup>25</sup> Nañani yó xí'in náki'va yó, xáku ndá'ví ndi noo ndó ña on nandoso ndó ka'an ndó xí'in Ndios xa'a ndi.

<sup>26</sup> Ta xí'in ñato'ó ní ini ndó, chito ndó noo tá'an ndó, saá chindeé tá'an ndó.

<sup>27</sup> Xí'in ndayí Jesucristo, yi'i taPablo ká'an i xí'in ndó ña ka'vi ndó tutu yó'o noo ndi'i nivi na kándixa Jesucristo.

<sup>28</sup> Ta Jesucristo, Taa táKá'no noo yó, ná ke'é ra ñava'a xí'in ndó. Saá ná koo ña.

Alacatlalzala Mixtec New Testament  
Mixtec, Alacatlalzala: Alacatlalzala Mixtec New Testament (New  
Testament+)

copyright © 2019 Wycliffe Bible Translators, Inc.

Language: Mixtec, Alacatlalzala

Contributor: Wycliffe Bible Translators, Inc.

All rights reserved.

2020-11-11

---

PDF generated using Haiola and XeLaTeX on 14 Jun 2022 from source files dated 13 Jun  
2022

a74bfb3f-bd55-5ab9-983e-8d19de48c198